

PWYLLGOR SGRIWTINI PARTNERIAETH AC ADFYWIO

Cofnodion y cyfarfod hybrid a gynhaliwyd ar 10 Rhagfyr 2025

YN BRESENNOL:

Y Cynghorydd Dylan Rees (Cadeirydd)
Y Cynghorydd Gwilym O Jones (Is-gadeirydd)

Y Cynghorwyr Non Dafydd, Douglas M Fowle, Euryr Morris,
Pip O'Neill, Margaret Murley Roberts, Ken Taylor, Sonia Williams a
Liz Wood

Ms Kathryn Seeney - Rhiant Lywodraethwr - Sector Ysgolion
Cynradd, Ms Christina Williams - Rhiant Lywodraethwr Uwchradd
ac ADY

Aelodau Portffolio

Y Cynghorydd Dafydd Roberts - Aelod Portffolio Addysg a'r
Gymraeg (ar gyfer eitem 4);
Y Cynghorydd Ieuan Williams - Aelod Portffolio Prifffyrdd, Gwastraff
ac Eiddo a Newid Hinsawdd (ar gyfer eitem 3).

WRTH LAW:

Y Prif Weithredwr
Y Dirprwy Brif Weithredwr,
Cyfarwyddwr Addysg, Sgiliau a Phobl Ifanc (ar gyfer eitem 4),
Pennaeth Gwasanaeth Prifffyrdd, Gwastraff ac Eiddo (ar gyfer
eitem 3),
Pennaeth Democratiaeth,
Rheolwr y Gwasanaethau Cyfreithiol/Dirprwy Swyddog Monitro
(GPW) (ar gyfer eitem 3 yn unig),
Prif Swyddog Rheoli Gwastraff (ME) (ar gyfer eitem 3 yn unig)
Arweinydd Strategol (Cynradd) (RW) (ar gyfer eitem 4 yn unig)
Prif Swyddog Digidol (MH) (ar gyfer eitem 4 yn unig)
Swyddog Sgrwtini (EA),
Swyddog Pwyllgorau (MEH),
Swyddog Gweddarlledu'r Gwasanaeth Pwyllgorau (FT).

YMDDIHEURIADAU:

Cynghorwyr John Ifan Jones a Derek Owen.

Y Cynghorydd Alun Roberts - Aelod Portffolio Hamdden,
Twristiaeth, Morwrol ac Eiddo;
Y Cynghorydd Robin Williams - Dirprwy Arweinydd ac Aelod
Portffolio Cyllid, Busnes Corfforaethol a Phrofiad y Cwsmer.

HEFYD YN BRESENNOL:

Aelodau Portffolio

Cyngorydd Neville Evans - Aelod Portffolio Gwasanaethau
Oedolion;
Y Cyngorydd Dyfed Wyn Jones - Aelod Portffolio Plant, Pobl Ifanc

1 YMDDIHEURIADAU

Fel y nodir uchod.

2 DATGANIAD O DDIDDORDEB

Ni dderbyniwyd yr un datganiad.

3 YMGYNGHORIAD CASGLU GWASTRAFF AC AILGYLCHU

Cyflwynwyd adroddiad y Pennaeth Priffyrdd, Gwastraff ac Eiddo i'w ystyried gan y Pwyllgor.

Dywedodd yr Aelod Portffolio ar gyfer Priffyrdd, Gwastraff a Newid Hinsawdd fod gan y Cyngor rwymedigaeth statudol i gyflawni cyfradd ailgylchu o 70%, ac nad yw'n gwneud hynny ar hyn o bryd. Er mwyn gwella'r cyfraddau ailgylchu a bodloni'r rhwymedigaeth statudol, mae'n rhaid i'r Cyngor ystyried gwneud newidiadau i drefniadau casglu gwastraff ac ailgylchu. Mae gofyniad i ymgynghori gyda'r rheiny sy'n debygol o gael eu heffeithio wrth ystyried unrhyw gynnig i wneud newid sylweddol i wasanaeth, yn enwedig os mai cynnig i leihau gwasanaeth ydyw. Gan y bydd unrhyw newid i'r gwasanaeth casglu yn effeithio ar gartrefi Ynys Môn, bydd angen dilyn proses ymgynghori lawn. Cyfeiriodd at Atodiad 1 oedd wedi ei atodi i'r adroddiad, a dywedodd fod y Cyngor wedi gosod ymrwymiad clir i warchod yr amgylchedd a lleihau ôl-troed carbon yng Nghynllun y Cyngor 2023-2028, ac mae ailgylchu yn hollbwysig mewn perthynas â'r gwaith hwnnw. Drwy leihau swm y gwastraff mae'n rhaid cael gwared ag o, gellir lleihau allyriadau, gwarchod adnoddau gwerthfawr a helpu i greu amgylchedd glanach, mwy gwyrdd ar gyfer cenedlaethau'r dyfodol. Ar hyn o bryd, mae cyfradd ailgylchu'r Awdurdod yn 65% sy'n is na'r targed o 70%, ac yn seiliedig ar y cyfraddau ailgylchu hyn, gall y Cyngor wynebu dirwy o oddeutu £350k bob blwyddyn. Dywedodd fod WRAP Cymru yn rhestru'r camau posibl y gellid eu cymryd i wella cyfraddau ailgylchu (roedd dolen ar gyfer y ddogfen ar gael yn Atodiad 1). Mae WRAP Cymru hefyd yn nodi bod modd ailgylchu 52% o'r gwastraff sy'n cael ei roi mewn biniau du ar Ynys Môn ar hyn o bryd, ac maent wedi ymweld â Safle Gwastraff Penhesgyn i wahanu'r gwastraff yn y biniau du. Dywedodd yr Aelod Portffolio ar gyfer Priffyrdd, Gwastraff a Newid Hinsawdd mai bwriad yr adroddiad yw cadarnhau a yw'r Pwyllgor Sgriwtini o'r farn fod y cwestiynau yn y ddogfen ymgynghori yn briodol a digonol. Yn dibynnu ar ganlyniad y broses ymgynghori, mae'n bosibl y bydd biniau du yn cael eu casglu bob 4 wythnos yn y dyfodol. Dywedodd ei bod yn bwysig cael ymateb i'r ymgynghoriad, a all fod yn ddadleuol, er mwyn cael safbwyntiau ar ffyrdd i wella ailgylchu ar yr ynys. Dywedodd y byddai'n rhaid cael buddsoddiad ar gyfer unrhyw newid, o oddeutu £3m i £16m, er mwyn cael cerbydau newydd ac i wneud gwelliannau yn y safleoedd gwastraff ac ailgylchu, ac oherwydd hyn ni fydd unrhyw newid i'r gwasanaeth casglu yn digwydd dan 2029. Mae'n bosibl y bydd Llywodraeth Cymru'n darparu grantiau os ystyrir bod yr Awdurdod wedi ymrwymo i leihau gwastraff a gwella cyfraddau ailgylchu.

Dywedodd y Pennaeth Prifffyrdd, Gwastraff ac Eiddo y bydd angen gwneud mân newidiadau i'r holiadur i sicrhau ei fod yn cyd-fynd â'r gofyniad rhithiol sydd ar wefan y Cyngor a bydd cwestiwn ychwanegol yn cael ei gynnwys yn ymwneud â'r effaith ar yr iaith Gymraeg er mwyn cydymffurfio â'r Ddeddf Gydraddoldeb.

Wrth ystyried yr adroddiad, cafodd y materion isod eu crybwyll:-

- Nodwyd mai'r targed a osodwyd gan Lywodraeth Cymru ar gyfer awdurdodau lleol yw i gyrraedd cyfradd ailgylchu o 70%. Gofynnwyd a fydd yr Awdurdod yn wynebu dirwy o £350k bob blwyddyn nes bo'r newidiadau arfaethedig yn dod i rym o fewn y gwasanaeth casglu yn 2029. Gofynnwyd cwestiynau pellach ynghylch a ellir gwneud y newidiadau arfaethedig yn gynt a gwella cyfraddau ailgylchu drwy ddefnyddio darpariaeth ailgylchu ychwanegol h.y. casglu mwy o wastraff cardfwrdd. Dywedodd yr Aelod Portffolio Prifffyrdd, Gwastraff a Newid Hinsawdd mai gweledigaeth Llywodraeth Cymru yw sicrhau bod awdurdodau lleol yn ymdrechu i wella cyfraddau ailgylchu a bod ganddynt gynllun ar waith i gyrraedd cyfradd ailgylchu o 70%. Dywedodd y Pennaeth Prifffyrdd, Gwastraff ac Eiddo y bydd angen gwneud gwaith sylweddol i sicrhau bod yr isadeiledd ar waith cyn cyflwyno unrhyw newidiadau i'r gwasanaeth casglu gwastraff. Roedd o'r farn bod cyflwyno'r newidiadau ym mis Hydref 2029 yn briodol gan y bydd gostyngiad yn nifer uchel y twristiaid sydd ar yr Ynys a bydd hynny cyn cyfnod y Nadolig. Dywedodd y Prif Swyddog Rheoli Gwastraff fod y dirwyon a osodir gan Lywodraeth Cymru yn berthnasol ar hyn o bryd i awdurdodau lleol nad ydynt yn cyrraedd y cyfraddau ailgylchu gofynnol. Fodd bynnag, mae ymgynghori cyson yn digwydd gyda Llywodraeth Cymru gan eu bod angen tystiolaeth bod gan yr Awdurdod gynllun credadwy ar waith i gyrraedd y targedau ailgylchu gofynnol sy'n arwain at osgoi'r risg o ddirwyon a osodir, a bydd y broses ymgynghori yn rhan o'r sail dystiolaeth i fynd i'r afael â gofyniad Llywodraeth Cymru.
- Dywedwyd bod angen i bobl gael gwybodaeth ychwanegol ynghylch y deunyddiau y gellir eu hailgylchu yn hytrach na'u rhoi yn y bin du. Dywedodd yr Aelod Portffolio Prifffyrdd, Gwastraff a Newid Hinsawdd y byddai gwaith yn cael ei wneud gyda Thîm Cyfathrebu'r Awdurdod i hyrwyddo ac addysgu trigolion am y gofynion ailgylchu drwy'r cyfryngau cymdeithasol. Dywedodd y Pennaeth Prifffyrdd, Gwastraff ac Eiddo fod staff yn ymweld â chymunedau ac ysgolion i hyrwyddo ailgylchu a bod Llywodraeth Cymru wedi rhoi grant i gefnogi darpariaeth o'r fath. Cyfeiriwyd at y ffaith y dylid gwneud trigolion yn ymwybodol o'r math o ddeunyddiau y mae angen eu hailgylchu ac i bwysleisio bod gwastraff glân y gellir ei ailgylchu yn denu pris uwch.
- Codwyd cwestiynau ynghylch a yw'n bosibl y bydd diswyddiadau staff yn digwydd os bydd yr Awdurdod yn penderfynu casglu biniau du bob 4 wythnos. Dywedodd y Pennaeth Prifffyrdd, Gwastraff ac Eiddo nad oes disgwyl y bydd diswyddiadau staff gan y byddant yn casglu ac yn prosesu deunyddiau ailgylchu ychwanegol.
- Codwyd cwestiynau ynghylch a all yr Awdurdod dargedu'r ardaloedd sy'n is na'r ffigurau ailgylchu presennol o 65%. Dywedodd yr Aelod Portffolio Prifffyrdd, Gwastraff a Newid Hinsawdd fod rhai ardaloedd gyda nifer fawr o fflatiau a thai teras yng Nghaergybi sy'n ei gwneud hi'n anoddach i bobl allu ailgylchu a storio'r bocsys ailgylchu.

- Gofynnwyd a roddwyd ystyriaeth i'r posibilrwydd y bydd newid llywodraeth yn digwydd o fewn Llywodraeth Cymru yn dilyn Etholiad y Senedd ym mis Mai 2026 a all ddod â'r gofyniad am gyfraddau ailgylchu o 70% i ben. Dywedodd yr Aelod Portffolio mai blaenoriaeth Llywodraeth Cymru ar hyn o bryd yw cynyddu cyfraddau ailgylchu, ac mae angen mynd i'r afael â hyn. Dywedodd y Prif Weithredwr ei bod yn ofyniad statudol gan Lywodraeth Cymru i gynyddu'r cyfraddau ailgylchu o 70%, a bod yr Awdurdod wedi ymrwymo i gyrraedd y targed fel yr amlygir yng Nghynllun y Cyngor ar gyfer 2023-2028.
- Cyfeiriwyd at y ffaith bod yr Awdurdod wedi mynd y tu hwnt i'r gyfradd ailgylchu gofynnol o 70% yn flaenorol. Gofynnwyd beth oedd y rhesymau fod y cyfraddau ailgylchu wedi gostwng dros y blynyddoedd. Dywedodd y Pennaeth Prifffyrdd, Gwastraff ac Eiddo fod y gostyngiad mewn cyfraddau ailgylchu wedi digwydd yn ystod y cyfnod clo yn ystod y pandemig. Mae tueddiadau'n newid, ac mae pobl yn prynu mwy o nwyddau ar-lein, ac felly mae cynnydd mewn gwastraff cardbord. Dywedodd nad yw rhai twristiaid wedi arfer ag ailgylchu, fel sy'n ofynnol yng Nghymru. Gofynnwyd a allai cynyddu'r gyfradd yn uwch na 5% fod yn opsiwn i'w ystyried. Dywedodd yr Aelod Portffolio Prifffyrdd, Gwastraff a Newid Hinsawdd y gwerthfawrogi'r bydd gwahaniaeth barn ynghylch y newidiadau arfaethedig wrth gasglu gwastraff y gellir ei ailgylchu a sbwriel bin du, ond y cynnig yw darparu bocsys ychwanegol i ailgylchu a mwy o gyfathrebu ac addysg am y gofyniad i ailgylchu. Dywedodd y Prif Weithredwr mai pwrpas yr adroddiad yw canfod a yw'r broses ymgynghori yn ddigonol i fesur barn trigolion Ynys Môn o ran yr angen i gynyddu'r cyfraddau ailgylchu ar Ynys Môn ac, o bosibl, casglu biniau du bob 4 wythnos. Nododd fod gwaith sylweddol eisoes wedi'i wneud gyda WRAP Cymru a Llywodraeth Cymru, sydd wedi arwain at yr angen i wella'r cyfraddau ailgylchu ac osgoi dirwyon posibl. Dywedodd fod angen dull penodol mewn rhai ardaloedd, gyda rhai trigolion ddim yn cyfrannu at yr angen i ailgylchu.
- Gofynnwyd cwestiynau am y 52% o ddeunyddiau ailgylchadwy oedd yn y bin sbwriel du. Dywedodd yr Aelod Portffolio Prifffyrdd, Gwastraff a Newid Hinsawdd mai gwastraff bwyd yn bennaf sydd wedi'i ganfod yn y bin sbwriel du, a fyddai wedi gallu ei ailgylchu.
- Cyfeiriwyd at amseriad yr ymgynghoriad cyhoeddus a ddechreuodd ar 7 Ionawr, 2026 fydd yn para 6 wythnos. Gofynnwyd cwestiynau ynghylch a fyddai'n fanteisiol cynnal y broses ymgynghori gyhoeddus pan anfonir Biliau'r Dreth Gyngor at drigolion yr Ynys. Credwyd y byddai hyn yn rhoi mwy o gyhoeddusrwydd i bobl nad oes ganddynt gyfryngau cymdeithasol. Dywedwyd y dylai'r dulliau ymgynghori dargedu'r henoed nad oes ganddynt gyfryngau cymdeithasol, ac y dylid cynnal ymweliadau yn eu cymunedau lleol. Dywedodd yr Aelod Portffolio Prifffyrdd, Gwastraff ac Eiddo nad oedd yn siŵr a fyddai gohirio'r broses ymgynghori yn arwain at fwy o bobl yn ymateb i'r ymgynghoriad, ond y byddai'n trafod y mater gyda'r Swyddogion yn fuan. Nododd mai'r rheswm dros ddechrau'r ymgynghoriad ddechrau'r flwyddyn oedd i osgoi cyfnod cyn-etholiad Etholiadau'r Senedd ym mis Mai 2026 ac er mwyn gallu gwerthuso'r ymatebion. Dywedodd Pennaeth Prifffyrdd, Gwastraff ac Eiddo fod dolenni ar gael ar gyfryngau cymdeithasol yr Awdurdod i amlygu lle mae'r deunyddiau ailgylchu'n cael eu prosesu. Aeth ymlaen i ddweud y byddai gohirio'r ymgynghoriad yn cael effaith negyddol gan fod angen i'r Awdurdod ddangos yr ymrwymiad o ran gwella cyfraddau ailgylchu er mwyn osgoi dirwyon posibl gan Lywodraeth Cymru.

- Gofynnwyd cwestiynau ynghylch a oes datrysiadau eraill wedi'u hystyried pe bai ymateb negyddol gan drigolion yr Ynys yn ystod y broses ymgynghori. Dywedodd yr Aelod Portffolio Prifffyrdd, Gwastraff ac Eiddo ei bod yn hollbwysig fod trigolion yr Ynys yn ymateb i'r broses ymgynghori gan ei fod yn effeithio ar bob preswilydd o ran casglu gwastraff ac ailgylchu.
- Cyfeiriwyd at faint o nwyddau sy'n cael eu pecynnu gan archfarchnadoedd a chwmnïau sy'n dosbarthu nwyddau fel Amazon ac mae angen targedu'r cwmnïau hyn yn hytrach na'r trigolion yn unig. Cytunodd yr Aelod Portffolio Prifffyrdd, Gwastraff a Newid Hinsawdd y dylai llywodraethau dargedu cwmnïau ac archfarchnadoedd i leihau deunydd pacio. Gofynnwyd cwestiynau pellach ynghylch a oes gostyngiad mewn ailgylchu yn y gweithle gyda mwy o bobl yn gweithio gartref. Dywedodd y Prif Weithredwr fod ailgylchu yn y gweithle ac yn y cartref yn cael eu rheoli ar wahân a bod dyletswydd i wneud y mwyaf o'r ddau er mwyn cyrraedd y targedau ailgylchu. Dywedodd fod system ailgylchu newydd wedi'i chyflwyno yn Swyddfeydd y Cyngor i wella ailgylchu yn y gweithle.

PENDERFYNWYD argymhell y canlynol i'r Pwyllgor Gwaith:-

- **Cymeradwyo cynnal proses ymgynghori ar newid y gwasanaeth ailgylchu/casglu gwastraff i helpu i gwrdd â'r targed ailgylchu statudol o 70%.**
- **Derbyn y cwestiynau i'w gofyn fel rhan o'r broses ymgynghori.**
- **Derbyn yr amserlen ar gyfer yr ymgynghoriad cyhoeddus, yn dechrau ar 7 Ionawr, 2026 ac yn para am 6 wythnos, ond gyda'r disgwyliad y rhoddir ystyriaeth i bryder y Pwyllgor.**

4 CYNLLUN STRATEGOL DIGIDOL ADDYSG 2026-2031

Cyflwynwyd adroddiad y Cyfarwyddwr Addysg, Sgiliau a Phobl Ifanc i'r Pwyllgor ei ystyried.

Dywedodd yr Aelod Portffolio Addysg a'r Iaith Gymraeg fod y Cynllun Strategol Addysg Ddigidol yn cyfrannu at ddatblygu system addysg fodern. Daeth y cynllun presennol i ben yn 2024 ac felly mae angen sefydlu cynllun newydd ar gyfer y cyfnod nesaf. Mae'r gofyniad am offer TG mewn ysgolion wedi cynyddu dros y blynyddoedd ac mae'n bwysig eu bod yn bodloni'r gofynion cyfredol.

Wrth ystyried yr adroddiad, cafodd y materion isod eu crybwyll:-

- Cyfeiriwyd at y ffaith bod yr adroddiadau'n nodi bod y Cyngor wedi clustnodi swm i ariannu'r Cynllun Strategol, ond mae'n annhebygol y bydd y cronfeydd a glustnodwyd ar hyn o bryd yn ddigonol. Codwyd cwestiynau ynghylch y goblygiadau i'r Cynllun, hynny ydi, nad oes digon o gyllid a beth yw'r diffyg y mae'r Cyngor yn ei wynebu. Dywedodd y Cyfarwyddwr Addysg, Sgiliau a Phobl Ifanc fod cyllid wedi'i glustnodi ar gyfer rhan o'r Cynllun Strategol, fodd bynnag, mae diffyg cyllid i gyflawni'r Cynllun ar hyn o bryd. Bydd yn rhaid cynnal trafodaethau i sicrhau y gellir dod o hyd i gyllid ychwanegol a bydd angen defnyddio data i sicrhau y bydd unrhyw gyllid yn cael ei ddefnyddio ar gyfer anghenion yr ysgolion. Bydd angen buddsoddi mewn offer a seilwaith. Nododd fod y Pwyllgor Gwaith wedi cymeradwyo cyllid ar gyfer y flwyddyn ariannol

gyfredol, a bydd angen ymchwilio i'r bylchau yn y dyfodol. Dywedodd y Prif Swyddog Digidol fod gwaith wedi'i wneud i fesur y diffyg posibl a'r gofynion seilwaith ynghyd â goblygiadau cost i uwchraddio offer yn barhaus. Bydd angen ymgysylltu ag ysgolion i fesur eu hanghenion er mwyn sicrhau bod y cwricwlwm yn cael ei fodloni.

- Gofynnwyd cwestiynau a fyddai gwybodaeth yn cael ei chasglu ynghylch sgiliau TG staff yr ysgol cyn gweithredu'r Cynllun Strategol. Dywedodd yr Arweinydd Strategol (Cynradd) fod sgiliau staff yn cael eu monitro, a bod Cydlynwyr Digidol yn casglu'r data mewn perthynas ag anghenion datblygu sgiliau o fewn y dalgylchoedd cynradd a oedd yn rhan o'r Cynllun blaenorol.
- Gofynnwyd sut fydd perfformiad y Cynllun Strategol yn cael ei fonitro yn ystod y cyfnod 2026-2031. Dywedodd yr Arweinydd Strategol (Cynradd) y bydd angen datblygu cefnogaeth yn y sector cynradd mewn perthynas â phynciau STEM gyda rhwydweithiau uwchradd sy'n cefnogi uwchsgilio ac yn rhannu arfer da gyda phob ysgol uwchradd. Mae hyn yn rhan o ddatblygu system hunan-ddatblygiadol.
- Gofynnwyd a oedd darpariaeth ddigonol wedi'i rhoi ar waith ar ôl i Gwmni Cynnal ddod i ben yn 2022. Dywedodd y Prif Swyddog Digidol fod trosglwyddo'r darpariaeth i'r Awdurdod ar ôl i Gwmni Cynnal ddod i ben yn 2022 wedi bod yn newid sylweddol i ysgolion a staff y Cyngor oedd wedi arfer derbyn y gwasanaeth gan Gwmni Cynnal ers blynnyddoedd lawer. Nododd fod ymgynghoriad wedi'i gynnal ag ysgolion i asesu eu gofynion ac i wneud yn siŵr bod darpariaeth TG yr ysgol yn ddigonol.
- Gofynnwyd a allai'r platfform digidol gefnogi plant ag anawsterau darllen a rhifedd. Dywedodd yr Arweinydd Strategol (Cynradd) fod angen edrych ar yr elfen ddigidol sy'n cefnogi'r cwricwlwm ac yn cyfoethogi'r ddarpariaeth i ddysgwyr.
- Gofynnwyd cwestiynau am nifer y Chromebooks ac iPads sydd mewn ysgolion ar hyn o bryd a faint yn fwy sydd heb eu cyfrif. Dywedodd y Cyfarwyddwr Addysg, Sgiliau a Phobl Ifanc fod rheoli dyfeisiau yn ddarpariaeth ar y cyd rhwng yr Adranau Dysgu a TG a'r ysgolion. Dywedodd y Dirprwy Brif Weithredwr mai cyfrifoldeb y Penaethiaid a'r Cyrff Llywodraethol yw sicrhau bod dyfeisiau TG yn yr ysgolion yn cael eu cyfrif. Gwnaed sylwadau pellach ei bod hi'n bwysig bod disgyblion yn defnyddio'r Chromebooks a ddarperir a bod Athrawon yn defnyddio'r dechnoleg i ddarparu gwersi addysgol. Dywedodd y Cyfarwyddwr Addysg, Sgiliau a Phobl Ifanc fod Grŵp Llywio wedi'i sefydlu, dan gadeiryddiaeth y Dirprwy Brif Weithredwr, fydd yn sicrhau trefniadau llywodraethu a monitro clir; rhoddir adborth gan y Grŵp Llywio i'r Aelod Portffolio dros Addysg a'r Iaith Gymraeg.
- Cyfeiriwyd at rannu arferion da sy'n digwydd o fewn ysgolion, gyda dwy ysgol yn buddsoddi mewn ffôn symudol i dderbyn negeseuon testun gan rieni. Defnyddiwyd platfform Google hefyd ar gyfer trosglwyddo disgyblion o Flwyddyn 6 i Flwyddyn 7 fel bo disgyblion yn rhannu eu pryderon a'u profiadau o'r cyfnod pontio i'r ysgolion uwchradd.
- Cyfeiriwyd at y ffaith bod rhai ysgolion yn defnyddio systemau digidol gwahanol a bod data rhai disgyblion ar goll. Dywedodd y Cyfarwyddwr Addysg, Sgiliau a Phobl Ifanc y byddai System Gwybodaeth Reoli newydd yn cael ei chyflwyno o fewn y 18 mis nesaf fydd yn arwain at fwy o gysondeb o ran defnydd yr ysgol o'r systemau. Dywedodd yr Aelod Portffolio dros Addysg a'r Iaith Gymraeg ei bod yn destun pryder bod sylwadau wedi'u gwneud bod data disgyblion ar goll.

Dywedodd fod gan bob ysgol bolisi GDPR a'u bod wedi derbyn hyfforddiant ar ddiogelu data.

- Gofynnwyd sut fydd y Cynllun Strategol yn cael ei fonitro o ran cau'r bwlch ar gyfer dysgwyr dan anfantais. Dywedodd y Cyfarwyddwr Addysg, Sgiliau a Phobl Ifanc fod angen sicrhau bod pob disgybl yn gallu cael mynediad at ddyfeisiau digidol. Bydd y Grŵp Llywio yn monitro'r ddarpariaeth. Bydd y Cynllun Strategol Digidol yn seiliedig ar ddata, a chyflwynir adroddiadau rheolaidd i'r Tîm Arweinyddiaeth ynghylch sut mae'r bylchau'n cael eu lleihau o fewn gwasanaethau digidol mewn ysgolion.
- Holwyd am y prif risg o ran seiberddiogelwch mewn ysgolion. Dywedodd y Prif Swyddog Digidol fod risg seiberddiogelwch yn cynyddu gyda'r cynnydd mewn dyfeisiau mewn ysgolion. Nododd fod asesiad wedi'i gynnal o'r risg seiberddiogelwch o fewn yr Awdurdod ac ysgolion sy'n cynnwys meddalwedd wystlo, gyda ffeiliau'n cael eu cloi a'r Cyngor yn wynebu risgiau pridwerth. Mae cynlluniau ar waith i liniaru'r risgiau ac i sicrhau bod diweddariadau a waliau tân wedi'u gosod ar ddyfeisiau.
- Cyfeiriwyd at y cyhoeddiad y bydd adweithyddion modiwlwr bach newydd yn cael eu hadeiladu ar Safle Wylfa a bod Ynys Môn wedi'i nodi fel parth twf DA. Gofynnwyd a oedd partneriaethau posibl wedi'u nodi o ran y parth twf DA ac a fyddai buddsoddiad gan y ddwy lywodraeth yn cael ei ganiatáu i wella sgiliau digidol ar yr Ynys. Dywedodd y Prif Weithredwr fod angen gwybod beth yw potensial y parth twf DA a nodwyd yn y lle cyntaf; gobeithir y bydd y buddsoddiad DA yn rhan o statws y Porthladd Rhydd. Dywedodd, unwaith y bydd statws y Porthladd Rhydd wedi'i sefydlu, y bydd ymgysylltu'n digwydd gyda phartneriaid allweddol fel Coleg Menai a Phrifysgol Bangor i sicrhau bod y cyrsiau addysgol yn cyd-fynd â disgwyliadau cyflogwyr posibl ar gyfer y genhedlaeth nesaf.
- Gofynnwyd a oes potensial i ddisgyblion gael eu haddysgu ar sut i ddefnyddio ffonau symudol yn ddiogel a defnyddio llwyfannau digidol a argymhellir o fewn amgylchedd yr ysgol. Dywedodd y Cyfarwyddwr Addysg, Sgiliau a Phobl Ifanc fod defnyddio ffonau symudol o fewn amgylchedd yr ysgol yn fater i Gyrrff Llywodraethu'r ysgolion.
- Cyfeiriwyd at y ffaith bod y dechnoleg ddigidol yn parhau i ddatblygu gyda thechnoleg yn cael ei huwchraddio'n rheolaidd. Codwyd cwestiynau ynghylch y risg sy'n gysylltiedig â'r diffyg cyllid sydd ar gael i barhau i uwchraddio systemau er mwyn sicrhau y gall disgyblion fanteisio ar bob cyfle i allu cystadlu am gyfleoedd gwaith yn y dyfodol. Dywedodd y Prif Swyddog Digidol ei bod yn her gallu uwchraddio systemau yn barhaus. Nododd fod yr Awdurdod yn ffodus i fod yn rhan o Dîm Hwb Llywodraeth Cymru sydd â chynrychiolwyr o bob awdurdod lleol yng Nghymru sy'n trafod technolegau newydd, tueddiadau a phrosesau newydd wrth fynd i'r afael â thechnoleg DA a darpariaeth ariannu bosibl.
- Nodwyd nad oes gan rai disgyblion fynediad i'r rhyngrwyd gartref. Codwyd cwestiynau ynghylch sut y bydd y disgyblion hyn yn cael eu cefnogi os bydd mwy o ddarpariaeth yn cael ei chynnal ar-lein. Dywedodd y Cyfarwyddwr Addysg, Sgiliau a Phobl Ifanc ei bod hi'n bwysig bod ysgolion yn nodi'r gefnogaeth i bob disgybl pan fydd gwaith yn cael ei osod ar-lein.

PENDERFYNWYD derbyn cynnwys y Cynllun Strategol Addysg Ddigidol ar gyfer y cyfnod 2026-2031.

Daeth y cyfarfod i ben am 12.15 pm

**Y CYNGHORYDD DYLAN REES
CADEIRYDD**